

Dushman ke Rūbarū Mazbūtī

Rūhul Quds kī Zabardast Himāyat



*dushman ke rūbarū mazbūtī. rūhul quds kī
zabardast himāyat*

Firmness in the Face of the Enemy. The
Incredible Support of the Holy Spirit

by Bakhtullah

[*Ao, Khud Dekh Lo 30*]

(Urdu—Roman script)

© 2024 www.chashmamedia.org

published and printed by

Good Word, New Delhi

The title cover is a collage including garzapaloelhermano
[https://pixabay.com/illustrations/art-design-fire-dove-symbol-
flame-7148539/](https://pixabay.com/illustrations/art-design-fire-dove-symbol-flame-7148539/); Clker-Free-Vector-Images
<https://pixabay.com/vectors/fire-flames-burn-heat-warm-297752/>;
ditto <https://pixabay.com/vectors/fire-flame-red-heat-hot-305227/>;
VOLLEX <https://pixabay.com/vectors/koster-flame-fire-1898042/>.

Bible quotations are from UGV.

for enquiries or to request more copies:

askandanswer786@gmail.com

Fahrist

Dushman ke Rūbarū Mazbūt Raho	1
Gawāhī Dene kī Mazbūtī Pāo	6
Māfi kī Mazbūtī Pāo	8
Rāstbāzī kī Mazbūtī Pāo	9
Chhuṭkāre kī Mazbūtī Pāo	11
Sachchāi kī Mazbūtī Pāo	12
Injīl, Yūhannā 15:18–16:4	14

Is duniyā ko chhoṛkar chale jāne se pahle Īsā Masīh apne shāgirdoñ ko us waqt ke lie taiyār karnā chāhtā thā jab wuh un ke sāth nahīn hogā. Us ne farmāyā ki mat ghabrāo, tum akele nahīn rahoge. Rūhul-quds tum par nāzil hogā. Wuhī merī qurbat aur madad dilāegā. Is silsile meñ Masīh ne ek nayā pahlū chheṛā—dushman ke rūbarū mazbūtī. Ham muḥhālifoñ ke sāmne kis tarah mazbūt rah sakte haiñ? Yih is sabaq kā mazmūn hai. Pahlī bāt,

Dushman ke Rūbarū Mazbūt Raho

Īsā Masīh ne farmāyā,

Agar duniyā tum se dushmanī rakhe to yih bāt zahn meñ rakho ki us ne tum se pahle mujh se dushmanī rakhī hai.

(Yūhannā 15:18)

- *Is bāt meñ duniyā kaun hai?*

Duniyā wuh sab haiñ jo Ẹhudā ke tābe nahīn rahte.

- *Jo Masīh par īmān lāe haiñ kyā wuh bhī duniyā ke haiñ?*

Nahīn. Masīh ne farmāyā,

Agar tum duniyā ke hote to duniyā tum ko apnā samajhkar pyār kartī. Lekin tum duniyā ke nahīn ho. Mainne tum ko duniyā se alag karke chun liyā hai. (Yūhannā 15:19)

- *Jo īmān rakhte haiñ wuh duniyā ke nahīn haiñ. Kyon?*

Islie ki Īsā Masīh ne unheñ duniyā se alag karke chun liyā hai.

- *Kyā duniyā Ẹhush hai ki Masīh ne īmāndāron ko alag kar liyā hai?*

Nahīn. Īsā Masīh ne farmāyā,

Agar unhoñ ne mujhe satāyā hai to tumheñ bhī satāeñge. (Yūhannā 15:20)

- ▶ *Yih nāḳhushī kis tarah mālūm hotī hai?*

Yih nāḳhushī satāne se mālūm hotī hai. Jinhoñ ne Masīh ko satāyā wuh us ke shāgirdoñ ko satāne ke lie har rāstā nikāleñge. Īsā Masīh ne farmāyā,

Lekin tumhāre sāth jo kuchh bhī kareñge, mere nām kī wajah se kareñge, kyonki wuh use nahīñ jānte jis ne mujhe bhejā hai. (Yūhannā 15:21)

- ▶ *Duniyā ke log kis ke nām kī wajah se imāndāroñ ko satāeñge?*

Wuh Masīh ke nām kī wajah se unheñ satāeñge.

- ▶ *Wuh unheñ kyon satāeñge?*

Wuh Ḳhudā Bāp ko nahīñ jānte jis ne use bhejā thā.

- ▶ *Wuh kis lihāz se Ḳhudā Bāp ko nahīñ jānte?*

Īsā Masīh ne Ḳhudā Bāp kī marzī un par zāhir kī lekin unhoñ ne use qabūl nahīñ kiyā thā. Islie wuh Ḳhudā Bāp ko nahīñ jānte.

► *Yahān iskā kyā matlab hai ki wuh Ḳhudā Bāp ko nahīn jānte?*

Yahān iskā matlab yih nahīn hai ki wuh Ḳhudā ke bāre meñ ilm nahīn rakhte. Yahān iskā matlab hai ki un kā Ḳhudā se rishtā nahīn hai, tālluq nahīn hai. Unhoñ ne uskī marzī rad karke us ke ghar wāle banane se inkār kiyā hai. Ġharz, imāndāroñ ko dūsroñ ke hamloñ ke lie chaukas rahnā chāhie. Wuh hairān na hoñ agar unheñ satāyā jāe. Aur yih satānā kāi bār bahut saḳht hogā. Īsā Masīh ne farmāyā,

Wuh tum ko Yahūdī jamātoñ se nikāl deñge, balki wuh waqt bhī āne wālā hai ki jo bhī tum ko mār ḍālegā wuh samjhegā, ‘Mainne Allāh kī ḳhidmat kī hai.’ (Yūhannā 16:2)

► *Imāndāroñ ke sāth kyā kiyā jāegā?*

- Unheñ jamātoñ se nikāl diyā jāegā. Matlab hai unheñ birādārī se aur kāi bār ghar se bhī ḳhārij kiyā jāegā.

- Log īmāndāronī ko mār ḍāleṅge yih samajhkar ki mainne Allāh kī ḵhidmat kī hai.

Ġharz, yih koī naī bāt nahīn hai ki logoñ ko īmān ke bāis ghar aur birādarī se bhagāyā jātā hai.

► *Kyā aise satāne wāle sachmuch dīndār hote haiñ?*
Nahīn. Īsā Masīh ne farmāyā,

Wuh is qism kī harkateñ islie kareṅge ki unhoñ ne na Bāp ko jānā hai, na mujhe. (Yūhannā 16:3)

Yoñ Īsā Masīh mujh se aur āpse pūchh rahā hai ki kyā tum duniyā kī dushmanī sahne ke lie taiyār ho? Phir bhī wuh hameñ ḍarānā nahīn chāhtā. Uskā farmān hai ki mat ghabrāo, kyonki tumheñ ek azīm madadgār milegā. Rūhul-quds tum par nāzil hogā jo tumheñ dushman kā sāmna karne kī mazbūtī dilāegā. Kis tarah? Wuh tumhārā dil pāñch bātoñ se bharkar mazbūtī dilāegā. Pahlī bāt,

Gawāhī Dene kī Mazbūtī Pāo

Īsā Masīh ne farmāyā,

Jab wuh madadgār āegā jise maiñ Bāp kī taraf se tumhāre pās bhejūngā to wuh mere bāre meñ gawāhī degā. Wuh sachchāī kā Rūh hai jo Bāp meñ se nikaltā hai. Tum ko bhī mere bāre meñ gawāhī denā hai, kyonki tum ibtidā se mere sāth rahe ho.

(Yūhannā 15:26-27)

- ▶ *Īsā Masīh Rūhul-quds bhejegā to wuh kyā karegā? Wuh Īsā Masīh ke bāre meñ gawāhī degā.*
- ▶ *Jab log hamāre khilāf khare ho jāen to yih kyon ahm hai ki ham Rūhul-quds kī gawāhī pāen?*
Jab dāñwāñdol hone kā khatrā hai to Rūhul-quds hameñ Masīh ke kām aur kalām kī yād dilātā hai. Na sirf yih balki wuh hameñ Masīh kī qurbat bhī dilātā hai. Tab ham apnī zindagī aur bāton se Masīh ke bāre meñ puḡhtā gawāhī de sakte hain.
- ▶ *Kyā āpko gawāhī dene kī tāqat mil gāī hai?*

Īmān lāne se āpkā dil Rūhul-quds kī gawāhī se bhar jātā hai. Tab āp mazbūtī se muḵhālīf duniyā kā sāmna kar sakte haiñ.

Phir Īsā Masīh ne ek pahelī pesh kī. Us ne Rūhul-quds ke bāre meñ farmāyā,

Jab wuh āegā to gunāh, rāstbāzī aur adālat ke bāre meñ duniyā kī ḡhalatī ko be-niqāb karke yih zāhir karegā: **gunāh** ke bāre meñ yih ki log mujh par īmān nahīn rakhte, **rāstbāzī** ke bāre meñ yih ki main Bāp ke pās jā rahā hūñ aur tum mujhe ab se nahīn dekhoge, aur **adālat** ke bāre meñ yih ki is duniyā ke hukmrān kī adālat ho chukī hai. (Yūhannā 16:8-11)

Rūhul-quds tīn bātoñ meñ duniyā kī ḡhalatī be-niqāb karegā—gunāh, rāstbāzī aur adālat ke bāre meñ uskī ḡhalatī. Ham yih pahelī kis tarah suljhā sakte haiñ?

Yih samajhne ke lie yih jānanā zarūrī hai ki jo bhī īmān lāe use tīn chīzeñ miltī haiñ: gunāh kī māfī,

Masīh kī rāstbāzī aur adālat se chhuṭkārā. Yahī tīn chīzeñ duniyā kabhī nahīñ pā saktī. Duniyā apne gunāh, apne jhūṭh aur ilāhī adālat se najāt nahīñ pā saktī. Hāñ, wuh yih bāt māntī bhī nahīñ. Islie Rūhul-quds uskī yih ḡhalatī be-niqāb kartā rahegā. Dūsri taraf Rūhul-quds in tīn bātoñ se imāndāroñ ko mazbūt kartā rahegā tāki wuh duniyā ke hamloñ se bache raheñ. Islie dūsri bāt,

Māfi kī Mazbūti Pāo

Īsā Masīh ne farmāyā ki Rūhul-quds gunāh ke bāre meñ duniyā kī ḡhalatī be-niqāb karegā.

► *Wuh gunāh ke bāre meñ duniyā kī ḡhalatī kis tarah be-niqāb karegā?*

Duniyā kī ḡhalatī is se be-niqāb hogī ki log Masīh par imān nahīñ rakhte.

► *Imān na rakhnā kyon gunāh kā sabūt hai?*

Īsā Masīh ke wasīle se hamāre gunāh māf hue haiñ. Sirf ek wajah hai ki insān ko Masīh kī māfi na mile. Wajah yih hai ki wuh imān na lāe. Jo imān nahīñ lātā uskā chhuṭkārā nāmumkin hai.

Duniyā kā yahī hāl hai. Wuh nahīn samajhtī ki mujhe us māfī kī zarūrat hai jo sirf Īsā Masīh de saktā hai. Lekin imāndār ko patā hai ki yahī bāt mujhe ḍānwāṇḍol ho jāne se bachātī hai.

► *Kyā āpko Masīh kī māfī mil gai hai?*

Imān lāne se āpkā dil Rūhul-quds kī madad se māfī kī ḡhushī se bhar jātā hai. Tab āp mazbūtī se muḡhālif duniyā kā sāmna kar sakte haiñ. Tisrī bāt,

Rāstbāzī kī Mazbūtī Pāo

Īsā Masīh ne farmāyā ki Rūhul-quds rāstbāzī ke bāre meñ duniyā kī ḡhalatī ko be-niqāb karegā.

► *Wuh yih kis tarah karegā?*

Is se ki Īsā Masīh Ḳhudā Bāp ke pās jā rahā hai.

► *Ḳhudā Bāp ke pās jāne kā kyā matlab hai?*

Ḳhudā Bāp ke pās jāne kā rāstā salībī maut thī. Is salībī maut se hameñ na sirf uskī māfī hāsil huī balki uskī rāstbāzī bhī.

► *Salībī maut se hameñ rāstbāzī kis tarah hāsil huī?*

Insān apnī tāqat se Ẹhudā ke sāmne rāstbāz nahīn ṭhahr saktā. Wuh apnī tāqat se kabhī wuh pākīzagī hāsil nahīn kar saktā jis se wuh Ẹhudā ke huzūr rāstbāz ṭhahr sake. Islie Īsā Masīh ne hamārī sazā apne ūpar lī tāki ham Ẹhudā Bāp ke sāmne rāstbāz ṭhahreñ. Yih hamārī apnī rāstbāzī nahīn balki usī kī hai. Islie hamārī najāt yaqīnī hai: Yih kām ham se nahīn balki us se huā jis kā har kām ṭhos aur pakkā hai.

Duniyā samajhtī hai ki merī rāstbāzī ṭhīk hī hai. Wuh yih nahīn māntī ki Īsā Masīh ko merī ṭhātir marne kī zarūrat thī tāki mujhe uskī rāstbāzī hāsil ho. Rūhul-quds duniyā kī yih ḡhalatī be-niqāb karegā, aur adālat ke dīn duniyā ko apnī ḡhalatī khul-e-ām mānanī paregī. Is ke muqābale meñ jise Īsā Masīh kī rāstbāzī hāsil hai wuh Rūhul-quds se mazbūt rahtā hai.

► *Kyā āpko Masīh kī rāstbāzī mil gai hai?*

Īmān lāne se āpkā dil Rūhul-quds kī madad se rāstbāzī kī ḡhushī se bhar jātā hai. Tab āp mazbūtī se muḡhālif duniyā kā sāmna kar sakte haiñ. Chauthī bāt,

Chhuṭkāre kī Mazbūtī Pāo

Īsā Masīh ne farmāyā ki Rūhul-quds adālat ke bāre meñ duniyā kī ḡhalatī be-niqāb karegā.

► *Wuh yih kis tarah be-niqāb karegā?*

Is se ki is duniyā ke hukmrān kī adālat ho chukī hai.

► *Duniyā kā hukmrān kaun hai?*

Iblīs.

► *Uskī adālat kis tarah ho chukī hai?*

Masīh kī maut se har wuh insān Iblīs ke qabze se chhūṭ gayā jo Masīh par īmān lāyā hai. Apnī maut aur jī uṭhne se Masīh ne Iblīs par fath pākar uskī adālat kī. Ab tak Iblīs garajte hue sher-babar kī tarah idhar-udhar ghūmkar sab ko harāp kar lene kī talāsh meñ rahtā hai. Lekin uskī hukūmat mahdūd hai. Ek din Īsā Masīh

wāpas ākar use us ke chelon samet pakaṛkar jahannum meñ ḍāl degā. Lekin jo Masīh par imān lāe haiñ un kā chhuṭkārā yaqīnī hai.

- *Kyā āpko Masīh kā chhuṭkārā mil gayā hai?*

Imān lāne se āpkā dil Rūhul-quds kī madad se chhuṭkāre kī ḡhushī se bhar jātā hai. Tab āp mazbūtī se muḡhālif duniyā kā sāmna kar sakte haiñ. Magar ḡhabrdār. Agar imān na lāe to āpkī adālat yaqīnī hai. Āḡhirī bāt,

Sachchāi kī Mazbūtī Pāo

Īsā Masīh ne farmāyā,

Mujhe tum ko mazīd bahut kuchh batānā hai, lekin is waqt tum use bardāsht nahīn kar sakte. Jab sachchāi kā Rūh āegā to wuh pūrī sachchāi kī taraf tumhārī rāhnumāi karegā.
(Yūhannā 16:12-13)

- *Rūhul-quds ko kyā nām diyā gayā hai?*
Sachchāi kā Rūh.
- *Iskā kyā matlab hai?*

Us par pūrā bharosā rakhā jā saktā hai kyonki wuh sarāsar sachchā hai. Us meñ jhūṭh nahīn hai.

► *Sachchāī kā yih Rūh kyā karegā?*

Yih pūrī sachchāī kī taraf hamārī rāhnumāī karegā.

► *Wuh yih kis tarah karegā?*

- Us ne Īsā Masīh kī har bāt qalamband karne meñ shāgirdon kī madad kī.

- Lekin āj bhī wuh hamārī rāhnumāī kartā hai.

► *Āj wuh kis tarah hamārī rāhnumāī kartā hai?*

- Wuh Ḳhudā kī marzī samajhne meñ hamārī rāhnumāī kartā hai.

- Is ṭerhī-merhī duniyā meñ wuh Ḳhudā kī marzī par amal karne meñ hamārī rāhnumāī kartā hai.

► *Kyā āp ko Rūh kī sachchāī mil gāī hai?*

Īmān lāne se āpkā dil Rūhul-quds kī madad se sachchāī kī ḳhushī se bhar jātā hai. Tab āp

mazbūtī se muḵhālif duniyā kā sāmna kar sakte haiñ.

Ġharz Masīh kī in bātoñ se Rūhul-quḍs kā aḥm kirdār ḵhūb mālūm hotā hai. Jo īmān rakhtā hai us ke lie duniyā kī dushmanī pakkī hai. Lekin īmān lāne se use ek aisā madadgār miltā hai jo har tarah se uskī madad karegā. Jab duniyā us par hamlā karegī to uskā dil mazbūt rahegā. Kyonki wuh gawāhī dene kī ḵhushī se bhar jāegā; wuh Masīh kī māfī, rāstbāzī aur chhuṭkāre kī ḵhushī se bhar jāegā; aur wuh Rūh kī sachchāī se bhar jāegā.

► *Kyā āpko yih madadgār hāsil huā hai?*

Injil, Yūhannā 15:18–16:4

Agar duniyā tum se dushmanī rakhe to yih bāt Zahn meñ rakho ki us ne tum se pahle mujh se dushmanī rakhī hai. Agar tum duniyā ke hote to duniyā tum ko apnā samajhkar pyār kartī. Lekin tum duniyā ke nahīn ho. Mainne

tum ko duniyā se alag karke chun liyā hai. Islie duniyā tum se dushmanī rakhtī hai. Wuh bāt yād karo jo mainne tum ko batāī ki ghulām apne mālik se baṛā nahīn hotā. Agar unhoñ ne mujhe satāyā hai to tumheñ bhī satāenge. Aur agar unhoñ ne mere kalām ke mutābiq zindagī guzārī to wuh tumhārī bātoñ par bhī amal karenge. Lekin tumhāre sāth jo kuchh bhī karenge, mere nām kī wajah se karenge, kyonki wuh use nahīn jānte jis ne mujhe bhejā hai. Agar main āyā na hotā aur un se bāt na kī hotī to wuh qusūrwar na ṭhahrte. Lekin ab un ke gunāh kā koī bhī uzr bāqī nahīn rahā. Jo mujh se dushmanī rakhtā hai wuh mere Bāp se bhī dushmanī rakhtā hai. Agar mainne un ke darmiyān aisā kām na kiyā hotā jo kisī aur ne nahīn kiyā to wuh qusūrwar na ṭhahrte. Lekin ab unhoñ ne sab kuchh dekhā hai aur phir bhī mujh se aur mere Bāp se dushmanī rakhī hai. Aur aisā honā bhī thā tāki Kalām-e-

Muqaddas kī yih peshgoī pūrī ho jāe ki ‘Unhoñ ne bilāwajah mujh se kīnā rakhā hai.’

Jab wuh madadgār āegā jise main Bāp kī taraf se tumhāre pās bhejūngā to wuh mere bāre meñ gawāhī degā. Wuh sachchāi kā Rūh hai jo Bāp meñ se nikaltā hai. Tum ko bhī mere bāre meñ gawāhī denā hai, kyoñki tum ibtidā se mere sāth rahe ho.

Maiñne tum ko yih islie batāyā hai tāki tum gumrāh na ho jāo. Wuh tum ko Yahūdī jamātoñ se nikāl deñge, balki wuh waqt bhī āne wālā hai ki jo bhī tum ko mār ḍālegā wuh samjhegā, ‘Maiñne Allāh kī k̄hidmat kī hai.’ Wuh is qism kī harkateñ islie kareñge ki unhoñ ne na Bāp ko jānā hai, na mujhe. Maiñne tum ko yih bāteñ islie batāi haiñ ki jab un kā waqt ā jāe to tum ko yād āe ki maiñne tumheñ āgāh kar diyā thā.

Maiñne ab tak tum ko yih nahīñ batāyā kyoñki main tumhāre sāth thā. Lekin ab main us ke

pās jā rahā hūn jis ne mujhe bhejā hai. To bhī tum meñ se koī mujh se nahīn pūchhtā, ‘Āp kahāñ jā rahe haiñ?’ Is ke bajāe tumhāre dil ḡhamzadā haiñ ki mainne tum ko aisī bāteñ batāī haiñ. Lekin main tum ko sach batātā hūn ki tumhāre lie fāydāmand hai ki main jā rahā hūn. Agar main na jāūn to madadgār tumhāre pās nahīn āegā. Lekin agar main jāūn to main use tumhāre pās bhej dūngā. Aur jab wuh āegā to gunāh, rāstbāzī aur adālat ke bāre meñ duniyā kī ḡhalatī ko be-niqāb karke yih zāhir karegā: Gunāh ke bāre meñ yih ki log mujh par imān nahīn rakhte, rāstbāzī ke bāre meñ yih ki main Bāp ke pās jā rahā hūn aur tum mujhe ab se nahīn dekhoge, aur adālat ke bāre meñ yih ki is duniyā ke hukmrān kī adālat ho chukī hai.

Mujhe tum ko mazīd bahut kuchh batānā hai, lekin is waqt tum use bardāsht nahīn kar sakte. Jab sachchāī kā Rūh āegā to wuh pūrī sachchāī

kī taraf tumhārī rāhnumāi karegā. Wuh apnī marzī se bāt nahīn karegā balki sirf wuhī kuchh kahegā jo wuh khud sunegā. Wuhī tum ko mustaqbil ke bāre meñ bhī batāegā. Aur wuh is meñ mujhe jalāl degā ki wuh tum ko wuhī kuchh sunāegā jo use mujh se milā hogā. Jo kuchh bhī Bāp kā hai wuh merā hai. Islie mainne kahā, ‘Rūh tum ko wuhī kuchh sunāegā jo use mujh se milā hogā.’